

VIII. KONVOJ „DA SE NIKAD NE ZABORAVI“

U petak, 30. 05. 2014. godine, kao dio VIII. konvoja "Da se nikad ne zaboravi", što ga već tradicionalno organizira Vijeće bošnjačke nacionalne manjine Grada Zagreba, uputili smo se s mnogobrojnim vršnjacima i drugim prijateljima i dragim ljudima u Srebrenicu, u pratnji naših dragih profesora (prof. Remzije i prof. Magdalene i prof. Saliha), kako bismo zajedno i ove godine odali počast mučki ubijenim Bošnjacima i Bošnjankama (od bebe do staraca) u genocidu koji su zločinci izvršili 11. VII. 1995. godine u nekad pitomom krajoliku istočne Bosne.



Učenici s profesoricom Magdalenom Pavelić-Hinšt, profesoricom Remzijom Hadžiefendić-Parić i profesorom Salihom Hadžismajlovićem

U petak smo se, nakon džume namaza, okupili svi mi, sudionici ovog konvoja, u dvorani "H. Salem Šabić" u Islamskom centru, gdje su nam se prigodnim riječima obratili naš uvaženi muftija dr. Aziz ef. Hasanović i gradonačelnik Grada Zagreba gosp. Milan Bandić,

poželjevši da pamteći ovaj 11. juli/srpnja i sami doprinesemo da se ovo zlo potkraj 20. stoljeća i neviđen barbarski čin nikad više i nigdje ne ponovi. Među onima koji su nas ispraćali bili su mnogi naši prijatelji, sudionici ranijih konvoja, roditelji, braća, sestre... Bio je tu i naš ravnatelj, poštovani Mevludi Arslani.

Lijepo ispraćeni s parkinga ispred Islamskog centra, krenuli smo sunčanog a tužnog dana na put ka Srebrenici. U četiri autobusa. Put Srebenice.

Na putu ka Srebrenici, u Tuzlu stižemo u kasnim večernjim satima. U lijepoj i gostoljubivoj Behram-begovu medresu naćamo kao dragi gosti i u subotu, rano ujutro, nakon doručka krećemo za Srebrenicu.



Na putu do Srebrenice zaustavili smo se u Bratuncu, na mezarju na kojem smo proućili Fatihu ubijenima od 1992. do 1995. u agresiji na BiH.

U Potočare smo stigli oko podne.

Mezarje.

Nišani. Bijeli, mnogobrojni, u tišini...

Spomen soba i bivša baza UN-a, razgovor s majkama Srebrenice kojima su odveli i mučki ubijali djecu naših godina, braću, supruge, očeve... Čovjek zanijem od sramote koju su učinili neljudi.

Slušali smo brojna svjedočenja i bolna iskustva majki Srebrenice, svjedoka... Vidjeli na filmu, zapamtili...



Učenici u obilasku Potočara

Snimao se i dokumentarac za HRT sve vrijeme putovanja. Vjerujemo da su zabilježene i naše suze i nijemi pogledi, naša silna želja da se ovo ne smije zaboraviti – da se više nikada i nikome ne bi ponovilo.



Snimanje dokumentarca za HRT

U Zagreb smo se vratili u petak, vrlo kasno.

Opet su nas dočekali zagrljaji najdražih.

Vjerujemo da je naš posjet Srebrenici i mezarju Potočarima čin razumijevanja i suosjećanja, ali i istinski znak odlučnosti da se sa svojim brojnim prijateljima iz cijele Hrvatske borimo za istinu, za dobro, za Život - dragocjen, najdragocjeniji Božji dar, a da ustajemo protiv laži, protiv zla i protiv mržnje.

Možda od ovih riječi fotografije, koje smo napravili, govore više...

Učenici I. i II. razreda, sudionici VIII konvoja „Da se nikad ne zaboravi“